

Llibrería Asturiana

Lliteratura

Poesía

* Nené Losada Rico, *Entre apigarzos*. Uviéu, Trabe, 1997. “La Fonte de Fascura” nº 14. [Esti ye'l segundu poemariu que publica Nené Losada, nacida en Lluarca en 1921].

* Humberto González, *Del país de la caliza*. Mieres, Editora del Norte, 1997. “Poesía Asturiana” nº 2. [IV Premiu de poesía “Fernán Coronas” de Cadavéu].

Prosa

* Ramón Lluis Bande, *Verdá o consecuencia*. Xixón, vtp editorial, 1997. “Domus”, nº 7. [Novela autobiográfica que narra la hestoria d'un neñu en Xixón nos años 70].

* Xosé María Vega, *Un sieglu de nós*. Xixón, vtp editorial, 1997. “Domus”, nº 8. [Xosé María Vega estrénase comu novelista con esta obra que presenta una Asturies que va dende'l caciquismu, la miseria y la emigración a principios de sieglu hasta la reivindicación cultural d'anguaño].


* Milio Rodríguez Cueto, *Aventures*. Xixón, vtp editorial, 1997. “Domus” nº 9. [Llibru de rellatos].

* Xosé Nel Riesgo, *Cuentos de la nevera*. Mieres, Editora del Norte, 1997. “Narrativa Asturiana” nº 10. [Una coleición de doce cuentos onde, al dicir del propiu autor, les situaciones que nellos se dan son les que se dan tamién n'Asturies, llugar onde sabemos d'ú venimos pero non a ónde vamos y onde la nevera ye la memoria colectiva d'un pueblu que pierde'l so ser. Segundo llibru del autor, xeográffu de profesión, qu'asoleyó la so primer obra, *El cai nunca duerme*, hai ochu años].

* Xuan Bello, *La memoria del mundu*. Xixón, Llibros del Pexe, 1997. “Puzzle de bolsu”, nº 25. [Con delles notes de Martín López-Vega].

Teatru

* Arsenio González Álvarez, *Tres comedies*. Uviéu, ALLA, 1997. Coleición de Teatru “Mázcara” nº 4. [Tres comedies da título a les pieces: *El bolero de Chano*, *La declaración* y *Los figos de San Miguel*. Caltién l'esquema del teatru costumista: trama mínima con dalgún enguedeyu que s'acaba esclariendo, clave de comedia (a través de dichos y refranes, de sátires siempre suaves), nun se reflexa la situación social, fálase de vezos tradicionales (*perdonés* pa la moza). Pero'l teatru d'Arsenio González tamién cuenta con dalgún niciu de modernidá, que se pue considerar renovador del teatru tradicional asturianu].



* Ramón Lluis Bande, *Aurelia*. Xixón, Conceyu Bable, 1997. [La versión definitiva d'esta pieza teatral de dos cuadros estrenóse na sala d'ensayos del Teatru Xovellanos de Xixón, el viernes 10 d'ochobre].

Torna

* Álvaro Cunqueiro, *Escuela de melecineros*. Uviéu, Trabe, 1997. “Inclá interior” nº 29. [Torna de X. Bello].

Lliteratura infantil y xuvenil

Orixinales

* Pablo Antón Marín Estrada, *Queta, periodista*. Xixón, Llibros del Pexe, 1997. [Les entrevistes d'esta neña-periodista acompañáense de les ilustraciones de Daniel Velasco].

* Xosé Lluis Rodríguez Alberdi, *El fervíu máxicu de medrar*. Uviéu, Trabe, 1997. “Montesín” nº 15. [Con esta obra, Xosé


Lluis Rodríguez Alberdi ganó'l Premiu "Montesín" de Lliteratura Infantil de 1996. Los dibuxos son de Jorge Faes].

Tornes

* Seve Calleja, *¿Por qué a Ana Casia llámenla Casiano?* Xixón, Llibros del Pexe, 1997. "La mar", nº 3. [Ilustraciones de Cristina Losantos y torna de X. Llano].



40. [Recuérdense, axuntaos por Xurde Blanco, trentaún poemes y tres diálogos representables asoleyao ente 1899 y 1935 per destremaes publicaciones asturianes y de la emigración].



* Daniel G. Nuevo Zarracina, *Antoloxía (1921-1978)*. Uviéu, ALLA, 1997. "Cartafueyos de Lliteratura Escaecida" nº 45. [Gracies a Xurde Blanco cuntamos nesta ocasión con cincu poemes, un entremés y tres rellatos de Daniel G. Nuevo Zarracina (Lleña 1899-Piedras Blancas 1983). Dicu material nun supón la totalidá nin muncho menos de la so creación llite-

aria n'asturianu, pero sí val de muestra del tipu de lliteratura que facía y de la llingua qu'emplegaba. Ye interesante comprobar que delles veces usa dialeutalismos y otros presenta una tendencia normalizadora nos sos testos; paez que pa esti llenense uno y otro nun ta reñío].


* José Antonio Naves, *El Requexu de los Cuentos*. Uviéu, ALLA, 1997. "Cartafueyos de Lliteratura Escaecida" nº 46. [Con esti cartafueyu apúrrenos material variao de José Antonio Naves, semeya incluyida, y el títulu que se-y da a l'antoloxía ye *El Requexu de los Cuentos*, el mesmu qu'emplegara l'escriptor pa denominar la so seición de rellatos curtiós asoleyada ente los años cuarenta y sesenta d'esti sieglu. La recogida de testos y la igua de la edición son de Xurde Blanco].


* Xosefa Xovellanos, *Obra poética*. Uviéu, Alvízoras, 1997. [Ed. de Xuan C. Bustu. Inxer estudiu y biografía de l'autora, dedicándose la segunda parte al asoleyamiento de materiales conocíos xunto con otros inéditos].

* Antón de Marirreguera, *Fábulas, teatru y romances*. Uviéu, Alvízoras, 1997. [Ed. de Xulio Viejo Fdez. Inxer estudiu y biografía del autor y la segunda parte dedícase al asoleyamiento de materiales conocíos xunto con otros inéditos].

Estudios y trabayos

* José Antonio Fernández Vior, *El habla de Vegadeo (A Veiga y su concejo)*. Uviéu, ALLA, "Llibrería Llingüística" nº 9. [Ye ésta la primer parte de la tesis doctoral que, col títulu *El habla del concejo de Vegadeo*, presentó na Universidá d'Uviéu en 1996 el profesor veigueno J. A. Fernández Vior. Ye una apor-





tación fundamental pa una mejor conocencia del gallego-asturianu porque hasta agora sólo se cuntaba coles monografíes d'El Franco, El Valedor y Eilao y nel conceyu d'A Veiga atópense un bon fexe d'isogloses que faen esta zona bien interesante. El llibru ábrese primero con unes notes hestóriques y un capítulu de xeografía llingüística onde l'autor nos amuesa les isogloses de dellos fenómenos que tienen nel conceyu d'A Veiga empiezu y acabu (*gardar/guardar, miña/mía, caixa/caxa, fio/filo, estreito/estreto, teu/tou*, etc.). Val-y esti primer apartáu pa presentanos mejor el panorama de trazos gallegos, asturianos, comunes a les dos llingüés y propios namái de la zona Navia-Eo, que s'alcuentren iguando un fexe d'isogloses pel mediu del conceyu qu'estudió. Pue falar asina de dos zones: una al oeste (Abres y Guiar), onde los trazos coinciden más col gallegu, y otra nel centru-oriente (A Veiga, Piantón, Paramios y Meredo), onde acaben fenómenos tanto del gallego-asturianu comu del asturianu. Depués de brindar dellos apuntes de la situación sociollingüística del conceyu, entra Fernández Vior no que ye'l megollu de la descripción de la fala, realizao too ello coles téuniques y metodoloxía que s'usen davezu nesta mena d'estudios. Tres apéndices pónen-y el ramu a esta obra: diecisiete testos trescritos de les entrevistes con dellos de los informantes, los sonogrames onde se sofító pa facer parte del estudiu fonéticu y fonolóxicu y la bibliografía. El vocabulariu y la parte etnollingüística van ver la lluz d'equí a poco n'otros dos llibros completando asina una visión de conxunto y bien apotada de lo que ye la fala d'A Veiga.


* Xulio Viejo Fernández, *La conformanza hestórica de l'antroponomía asturiana*. Uviéu, Conseyería de Cultura, 1997. "Documentos" nº 22. [Estudiu básicamente estadísticu que se

fixa na tradición, modes y continuidá nos nomes medievales de persona. Preséntase la evolución concreta de caún de los nomes per décadas, nun periodu decisivu pa la nuesa hestoria llingüística].

* M^a Xesús Llope & Xuan Porta, *Xuegos infantiles p'anguañu*. Xixón, Grupu de Cultura del Conseyu de la Mocedá, 1997. [76 xuegos infantiles tradicionales organizaos ún per ún en fiches cencielles pero mui completes y axuntaos en bloques temáticos (pa los más pequeñinos, de pelota, de goma, de preseos...) que permiten una fácil interpretación de los mismos. Un trabayu mui cuidáu].

Toponimia

* Xuan Lluis Cachero Sánchez, *Conceyu de Llena. Parroquia de Llanos*. Uviéu, ALLA, 1997. [Séptima entrega del Conceyu de Llena que mos ufre los topónimos d'una parroquia de la zona alta del conceyu con unes interesantes aportaciones llingüísticas que confirmen los datos que yá se tenían en cuantes a les carauterístiques de la fala d'esta fastera del centru-sur d'Asturies. L'autor ye un estudiante de Ciencies Físiques naciú nunha familia de Llanos que lleva muchos años asitiada n'Uviéu].



Antropoloxía económica y cultura

* Roberto González-Quevedo, *Economía y cultura. Cambios económicos y cambios culturales n'Asturias*. Mieres, Editora del Norte, 1997. "Ensayu" nº 2. [Premiu "Fuentes Acevedo" de la Conseyería de Cultura na edición de 1996. Ye un fondu y percutíu estudiu de los cambios pelos que pasó la sociedá asturiana

nos caberos trenta años, cambios que son productu de la tresformación de les estructures económiques tradicionales alinxerise les unidaes doméstiques campesines na economía de mercáu y percutir direutamente too ello nel conxuntu de la cultura asturiana. L'estudiu básase en trabayos de campu fechos n'Asturias dende l'añu 1976 y d'acuerdu col métodu antropolóxicu de la observación participante. Encuádrase na tradición de les teoríes propies de l'antropoloxía económica, especialmente les qu'estudien les sociedaes tradicionales y los procesos de cambiu social, bien conocíos y perestudiaos pol autor. L'estudiu esplica cómu son, dende los años 60, los cambios económicos na sociedá rural asturiana al convertise la familia tradicional nun productor asemeyáu a les unidaes productives capitalistes, anque conservando los rasgos propios de la unidá doméstica campesina].

Vocabularios

* Ramón d'Andrés Díaz & Manuel d'Andrés Fernández, *Vocabulariu asturianu de la mina*. Xixón, Alborá Llibros 1997. "Llibros del País" nº 2. [Obra aperiada pol filólogo Ramón d'Andrés a comuña col so pá, el minero y escritor Manuel d'Andrés "Mánfer de la Llera". A la información d'otros vocabularios anteriores d'esti mesmu calter amiéstase—y l'aportación que supón la esperiencia d'abondos años de trabayu peles mines de les cuenques centrales asturianes].

Material didáutico

* Grupu Llabor, *Guías didáutiques de Xana y Cuélebre*. Mieres, Editora del Norte, 1997. [Guías pa los profesores de llingua asturiana de los dos primeros ciclos d'enseñanza primaria. Estructuraos en dos unidaes por cada volume correspondiente a los llibros (asoleyao en 1996) y en cuadernos dixebrados que permiten un manexu perfácil. Otra bona ferramienta pa la enseñanza de la llingua].

Testos llitúrxicos

* Coleutivu "Manuel Fernández de Castro", *Lleicionariu de la Liturxa de los Domingos y Festividáes de los Ciclos: A, B, C*,

Sacramentos y Esequies. [Ye la torna dende los orixinales bíblicos de los testos llitúrxicos qu'acompañen a la celebración de la Eucaristía nos tres ciclos llitúrxicos añales A, B, C amás de los Sacramentos y Esequies. Los traductores foron M^a del Pilar Cabezas, Xosé Bernáldu García Carrera, Montserrat Machicado Compañy y M^a del Carmen Torijano Pérez y el coordinador de la traducción y revisor xeneral del testu Federico G.-Fierro Botas. Ye otru entamu del coleutivu "Manuel Fernández de Castro" que vien a xuntase con les seis obres yá asoleyaoes dende 1991 y que van conformando'l corpus de testos relixosos en llingua asturiana].

Entrambasaujas

* El número 6 de la revista *Entrambasaujas*, que salió de parte seronda, abre les sos págines cola collaboración del xeógrafu Fredo de Carbezé tratando un asuntu d'importancia pal futuru económico de la zona Ozcos-Eo: les agroindustries. Jesús González Gayol esplícanos la gran importancia ecolóxica de la Ría del Eo y Manuel García-Galano, na sección *Xente d'esta terra*, fálanos d'Amalia de Carruyo, nieta, fía, ma, güela y bisagüela de pescadores tapiegos. Juan Carlos Quintana, na que ye la primer collaboración na fala más occidental del Navia-Eo, cíntanos dende Taramunde "Estrucias de ferreiros". Verardo Fernández, con un artículu sobre'l *Centru d'Instrucción y Recreo d'A Roda* y Emma Méndez, que pon la nota lliteraria col rellatu "El monte da Danza", zarren la nómina de collaboraciones. Esti número 6 complétase coles seiciones que yá son davezu: la infantil d'*El Arco da Veya*, con coses de los neños y neñes de la escuela de Tapia, l'*Axenda* y *El Houcha*, con un editorial de 1929 del periódicu *El Aldeano* escrito en gallego-asturianu.



Otros

* *Llagares de sidra natural de Nava y Villaviciosa*. Xixón, Asociación cultural El Duernu, 1997. [Esta obra avérase a les peculiaridaes, usos y costumes que tienen que ver cola ellaboración de la sidra. Céntrase nos conceyos de Nava y Villaviciosa por cuntar col tratamientu honoríficu de capital de la sidra y de la mazana respetivamente. Los autores son: Gonzalo Palomo Viñes, Xuan Porta Allende y Raúl Vallina Puente].

* Ramón Sordo Sotres, *Notes gramaticales y toponimia no latina en Asturias, Cantabria, León y Palencia* [Llanes], 1997. Col. “El Juguetu” nº 5.

Cómics

* *Los Aguarones. ¡Operación Urriellu!* (2 de 3), Ruma y Son. Xixón, Cactus Cómics, 1997. [Los aguarones Fliz y Polo ataqueun de nuevo. Esta vez tienen que s'apañar pa salir del talegu, sobrevivir a los viaxes nun “600” que pasó la i.t.v. en 1912 y llibrar L’Urriellu de los estrozos d’Asturdisnei, ente otros aventures].

* *La crónica de Leodegundo–XIV. El llugar de la paz (807–814 d.c.)*. Xixón, Llibros del Pexe, 1997. “Cómics del pexe”.

* *La crónica de Leodegundo–XV. Nel país de los mairíus (814–817 d.c.)*. Xixón, Llibros del Pexe, 1997. “Cómics del pexe”.

* *El Llapiceru–15*. Xixón, Conceyu Bable, 1987. [Coles collaboraciones de: Israel Álvarez, Jorge Luis Ortiz Suárez, Fera, Guerrero, Iván Olmedo y Xuacu Pardo].

Revistes y cartafueyos

* *Boletín SUATEA*, nºs 92, 93 (ochobre y payares–avientu, 1997). Uviéu.

* *Síntesis*. XXVI, XXVII. Uviéu, setiembre–ochobre y payares 1997. [Revista mensual de divulgación cultural con collaboraciones n’asturianu].

* *Gaceta de Xixón*. Xixón, Ayuntamiento de Xixón. [Comu d'un tiempu p’acá, esta revista nos números d’agostu, setiembre y ochobre sigue faciendo usu de la llingua asturiana en dalgún artículu].

* *El Sindicato*, nºs 107, 108 (payares y avientu, 1997). Uviéu, CC.OO. [Con collaboraciones n’asturianu].

* *Opinión*, nº 1 (mayu, 1997). El Cabu Peñes. [Periódicu mensual d’El Cabu Peñes que nació en mayu de 1997 y que, d’entós p’acá, incluí una seición n’asturianu que se llama “La nuesa llingua”].

* *Llengües vives (Bulletí d’actualitat lingüística del sud-oest europeu)*, nºs 5–6 (setiembre, 1997). Barcelona, Acció Pro-Llengües. [Cartafueyu de periodicidá bimestral. L’apartáu dedicáu a la nuestra llingua coordínalu David Guardado].

* *La Maniega*, nºs 100, 101 (setiembre–ochobre y payares–avientu 1997). Cangas del Narcea, A.C. Pintor Luis Álvarez. [Revista informativa d'esti conceyu occidental con dalgún artículu n’asturianu].

* *Payella*, nº 3 (payares 1997). Lluarca, Escuela Municipal de Música y Danza del Conceyu de Valdés.

* *Reloj de Arena (Revista de literatura)*, nº 17 (mayu, 1997). Avilés, Proserpina Literaria. [Publicación que nesti número ufierta tres artículos n’asturianu].

* *Isla desnuda*, nº 5 (ochobre 1997). [Un cartafueyu de creación lliteraria que s’asoleya n’Albacete y qu’inxer un poema n’asturianu de Luis Ordóñez con un entamín previu que fala del Nuberu, tema del poema].

* *El Tayuelu (fanzín cultural alternativu na nuesa llingua)*, nº 0 (payares, 1997). Les Arriondes (Parres), A. C. Fonte'l Cai. [Música, lliteratura, solidaridá son dellos de los temes que trata esti fanzín fechu nel oriente d’Asturies. El conseyu de redai-

ción fórmelu: Serxu Luaces, Gerardo Díaz y Lluis Nel Estrada. L'asesor llingüísticu ye Xandru Martino Ruz].

* *El Candil* nº 27, avientu 1997. [Periódicu escolar del C.P. Reconquista de Cangues d'Onís].

Música

* *Tierra*, Felpeyu. El 14 d'abril d'esti añu terminosé de grabar y iguar esti discu que produxo Fonoastur. Felpeyu son: Xuan Nel Expósito (curdión diatónica y gaita asturiana), Ruma Barbero (percusión), Toño Gómez (vigulín), Elfas García (vigulín, bouzouki y voz), Ígor Medio (bouzouki, guitarra y voz) y Carlos Redondo (baxu llétricu, guitarra y voz). La mayoría de los temes son tradicionales asturianos, perconocíos, anque tamién

los hai compuestos por integrantes del grupu. Amás, cuntaron cola collaboración de Fernando Álvarez-Balbuena y Boni Pérez comu lletristes.

* *Dieron en duru*, Dixebra. Tres de *Grieska* (1990), *Asturies o trabayes* (1993) y *Apíntate a la llista* (1995), llega'l últimu trabayu de Dixebra *Dieron en duru*, producdu por L'Aguañaz, que se presentó en Les Vegues (Corvera) el 22 de payares con una fiesta pa celebrar los diez años que lleva'l grupu faciendo música. Nesti discu atrópense trece cantares, la música siempre ye de Dixebra y tienen lletres de Manolo Karne Antisocial, Xandru Fernández, Boni Pérez, Gabriel Celaya, Toli Morilla y Pepeín Quevedo. Formen Dixebra: Javi (baxu), Fernando (gaita y xiblata), Fredi (percusión), Isra (batería), Xune (voz) y Primi (guitarra).

* * *

Diariu d'un viaxe

Diariu de viaxe. Adolfo Camilo Díaz
16 Premiu Xosefa Xovellanos 1995
Conseyería de Cultura. Principáu d'Asturias.

Llovía. Una tarde más de llibrería en llibrería, buscando llibros. Llibros d'esos qu'agora atarriquen los estantes ensin conciertu, y muncho menos, orde. Yá tenía'l macutu cuásique enllenu, porque, la verdá ye que nun facía falta ser mui arrogante pa faelo al preciu que tienen nesta dómina de muries baltaes. Ente ellos, comu güéspede escéntricu, el *Diariu de viaxe* d'Adolfo Camilo Díaz; y siguía lloviendo.

L'augua amás del cuerpu y les ideyes, tamién añagara los llibros. Asina que los fui ordenando con un aquel de cascancia nuna vieya alfombra. Ellí taben: *Cartas de una presa desde la galería de la muerte* de Ulrike Meinhoff, una estrambótica edición de *Mi vida* de León Trotsky; *La revolución española* de Joaquín Maurín, o los increyibles *Principios de economía política* de Pulitzer, y dalgún

qu'otru más que nun vien al casu. Y el *Diariu d'Adolfo*. El tiempu y la paciencia fexo que foren ensugando, dalgunos abangando con una cierta dignidá y otros engurriendo ensin nenguna. El *Diariu* quedó tarazáu por una cicatriz mariella fueya a fueya, que diba medrando de la primera a la última páxima. Foi acompañándome na mio llectura apasionada neto qu'un testigu, dacuandu incómodu.

Esti *Diariu* ye un viaxe al fondu de la memoria pal que nun fai falta tener mirao'l Caribe dende El Malecón de La Habana. Por eso, nun me paez gota casual la húmida compañía que'l llibru d'Adolfo tuvo nel mio devolar de llibrería en llibrería. Porque esos vieyos testos, de los qu'un amigu un daqué malévolu diz que vienen de la espurgada biblioteca d'un conceyal liberal-modernu d'una "dinámica" ciudá asturiana, que fuere en tiempos dirixente de la Liga Comunista, son parte d'un llugar dende'l qu'aprendimos a mirar el mundu. Y neñi llugar siempre tuvo Cuba, Cuba y la Revolución. Y esa cicatriz mariella que l'augua dexó llancada nes páxines del llibru, abultábame dalgo asina comu la esperanza d'aquellos a

los que Kavafis deseaba bon viaxe, a “*los guerreros qu’al so pueblu son fieles*”.

Nun voi falar del ritmu narrativu de la novela, nin de l’harmoniosa construcción del testu nin del perfil terrible de dalgunos personaxes, descritos cola precisión d’un puñal. Nun fai falta. *Diariu de viaxe* lleese dende la memoria de Xuan, el profesor d’Hestoria del Arte que mui bien podría nun selo, pero lleese, enriba too dende la memoria del lector. Non del *públicu llector*, qu’esi nun tien memoria. Dende la propia biografía del lector. La que seja, pero dende la so bigrafía. Bien ye verdá que cada llibru faise nuevu en cada llectura. Yo fixi la mía tarazada per una cicatriz mariella.

Y La Habana, que ye más qu’un recursu efectista pal desenvolvimientu de l’acción. La Habana, cola presencia de *Martia* atravesando la narración, xustificando'l dolor de la memoria, con *Marí* mirando la vida dende l’otru llau de les coses, cola soledá de la presencia-ausencia d’un padre ambiguu.

Obres completes de Manuel Fdez. de Castro

Cuandu atalántabamos nel 1986 fundar una asociación civil qu’acordies col número 2º de los Estatutos diz: “L’envís y xeres d'esta Asociación ye'l fomentu y espardimientu de la cultura asturiana y les cuestiones que se rellacionen con ella, inspiraes de contínu nel humanismu cristianu”, afína camentamos comu nome significativu d'ella, el del obispu asturianu homenaxeáu nesta XVIII Selmana de les Lletres Asturianes.

Manuel Fernández de Castro ye l’asturianu qu’afondando na so llingua llariega, estúdiala, normativízala y dignificala, emplegándola en tres niveles:

1º *Calter cimeru*. Ye dicir, l’emplegu nel campu más altu y eruditu, responsabilizándose de la traducción d'un llibru bíblicu, l'*Evanxeliu de San Matéu*.

2º. *Calter mediu*. Emplegu llingüísticu n’acontecimientos importantes de la so dómina, comu foi la traducción de la “Definición Dogmática de la Inmaculada Concepción de la Santísima

Virxen”, o Bula “Ineffabilis Deus” del Papa Pío IX, y otros documentos qu’entovía nun conocemos.

3º. *Calter baxu*. Ye'l de divulgación y espardimientu popular comu sofitu de la catequesis de los neños y la formación de los mozos: poemes, escenificaciones teatrales, etc.

Asina, sepártase de los tópicos del costumismu y del exclusivismu poéticu, dándo-y a la nuesa llingua la mejor prosa del sieglu XIX y de la primera metáda del XX.

El Coleutivu “Manuel Fernández de Castro” quixo y quier desendolcar la so tradición llingüística nestos tres niveles d'un mou direutu o indireutu. Na cai tán los nuesos espublizamientos, y na cai rúxese'l nuesu proyeutu de traducir tola Biblia al asturianu dende los testos orixinales griegos, hebreos y arameos. Proyeutu entamáu hai nueve años, y con 26 collaboradores.

La mio entruga fundamental güei, caberu día de les celebraciones d'esta Selmana, ye si la sociedá civil y eclesiástica d'Asturies pescanció'l mensaxe de D. Manolín.

Nuna Asturies d'espoxigue folclóricu nes sos reivindicaciones culturales, ¿onde tán los axentes rectores de la sociedá que dignifiquen n’abondo y perdayures lo más xenuín del nuesu calter llariegu, que ye la nuesa llingua? Ella ye l’encontu más afayadizu pa que seja verdá esa “Asturies patria querida” del nuesu himnu, el llazu pa facer de toos nós un Pueblu y una Tierra que seyan “la casa común”, el llar onde toos nos síntamos hermanos y solidarios.

Cien años dempués de la vida d'esti obispu intelixente y suntu, ¿en qué medida proporcional tenemos avanzao na xera qu’elli mesmu algamó y acolumbró?

Ensin la llingua, la nuesa lingua asturiana escrita y falada, nun sabremos enxamás caltener el nuesu raigaño, y afitar el nuesu troncu coles sos trupes xamasques, definiendo asina con claridá la nuesa ciudadanía asturiana n’antoxana del sieglu XXI.

Federico G.-Fierro Botas
(Na presentación de les *Obres Completas* de Manuel Fdez. de Castro
nel Paraninfo de la Universidá d’Uviéu, el 9 de mayu de 1997)

Manifestación pola oficialidá

El sábadu 24 de xineru, a llamada del *Pautu pol autogobiernu y la oficialidá*, fíxose n'Uviéu un gran manifestación que dende La Estación del Norte siguió hasta La Plaza l'Ayuntamiento. Ellí tuvo llugar la llectura del discursu que sigue darréu:

Asturianos y asturianes:

Una vegada más, comu nel mes d'ochobre pasáu, o comu'l 30 de payares de 1996 o comu'l 25 de payares de 1995, miles d'asturianos y asturianes, el pueblu d'Asturies, xúntense pa lluchar pol so futuru y pola dignidá. Porque, sabéilo, hailos ellí y equí que quieren tapecenos, emprobecenos, arrequeanos. Hailos que quieren que sintamos vergoña de ser asturianos. Hailos que quixerem qu'Asturies mesma desapaeciera.

Asina tenemos qu'entender la insostenible situación d'una economía asturiana llaceriosamente asitiada na cola de les comunidaes del Estáu, asina tenemos qu'entender un índiz de paru que constitúi un escándalu pa un país que dicen modernu y civilizáu, asina tenemos qu'entender la prepotencia y l'enchipamiento d'unos dirixentes de "provincies" que nos faen acordanos, nel so decir y actuar, de dómines pre-democrátiques.

Estos últimos díes, ensin dir más lloñe, intentábase otru pasu más nel esfarrapamientu de la industria pública d'Asturies. Si meses atrás-y tocaba a ENSIDESa, yá en manes privaes y foriates, agora l'oxetivu yera la minería. Porque tamién quixerem finar cola minería. Cola minería y colos mineros porque glayen y denuncien y lluchen y rispen por una vida digna. Pero tamién estos díes demostrábase la importancia de la xuntura colectiva, de la intelixencia y de la resistencia. Porque cuando un pueblu se xunta y actúa intelixentemente y resiste a la inxusticia ye muí difícil vencelu. Nós tamién queremos xuntanos y por eso tamos güei equí, tamién queremos reivindicar intelixentemente, y por eso lluchamos na llucha noble y civil de la manifestación y de la protesta social non violenta, y por eso damos anuncia de que resistiremos a cualquier intentu por convertir a Asturies nuna mera entidá territorial ensin posibidaes d'encadarmase comu país.

Porque, nun lo escaezamos, dalgunos nun se conformen con dexar frayaada a Asturies social y económicamente. Necesiten humillala y pa ello ye necesario cortar pela freba les sos posibilidaes de decisión política y tarazar, al empar, el verdaderu símbolu del pueblu: la llingua asturiana.

Pero, nosotros sabemos que nun hai diferencies, anque dellos cómplices intenten disimular el so desprecio a Asturies. Nun hai diferencies, non: los que nos frayan social y económicamente, atenten escontra Asturies; los que s'esquedeyen por afitar una dañible dependencia de Madrid, atenten escontra Asturies; los que faen risión de la nuesa cultura popular, atenten escontra Asturies; los que prohíben la llingua asturiana, atenten escontra Asturies y los derechos humanos.

Trátase, sí, de derechos. De derechos qu'otros ciudadanos del Estáu, comu los castellanos, gallegos, vascos, navarros, valencianos, baleares o catalanes tienen y que se nos nieguen a nós mientras se sigue apregonando que pertenecemos a un estáu democráticu y garante de les llibertaes públiques. Y trátase de que son les propies instituciones les qu'actúen escontra los derechos del pueblu, comu cuandu'l Delegáu del gobiernu de Madrid impugna, aplaudiu y afaláu pol presidente del P.P. n'Asturies, les declaraciones d'oficialidá de los conceyos, o comu cuandu'l Tribunal Superior de Xusticia d'Asturies s'allinia co la intransixencia p'afitar la prohibición del usu del asturianu na rellación de los ciudadanos colos Ayuntamientos, mientras dexa de llau'l fechu de qu'Asturies padez un Estatutu d'Autonomía que ye dafechu inconstitucional, xustamente por nun facer reconocencia de la oficialidá de la llingua asturiana.

Y mentantu pasa too esto, los dirixentes del P.P., dalgunos dirixentes del P.P. y, lo que ye una ofensa a los trabayadores y al conxuntu de los movimientos sociales progresistes d'Asturies, dalgunos dirixentes del P.S.O.E. que toos conocemos, sien un diciendo qu'una cosa ye la economía y otra la cultura y que l'autogobiernu y la oficialidá son cuestiones que naide demanda n'Asturies. ¿Qué ye, entós, lo que nós demandamos nesta plaza del Ayuntamiento, símbolu de la represión cultural al pueblu asturianu? ¿Somos una minoría o somos miles d'asturianos los qu'esiximos la capacidá d'autogobiernu p'Asturies

y la oficialidá de la nuesa llingua hestórica? Porque, de xuru, mañana dellos políticos antiasturianos y dellos comentaristes enllenos d'odiu hacia Asturies dirán na prensa, qu'esta convocatoria foi un fracasu y que les nueses demandes nun tienen eku social. Piensen que zarrando los güeyos, manipulando y negando la evidencia podrán seguir esbabayando y diciendo que n'Asturies nun hai problemes sociales nin conflictu llingüísticu.

Pero va tiempu qu'enquivoquen la estratexa. La vuesa presencia güei equí amuesa que'l llogru de la identidá política y cultural d'Asturies ye daqué irrenunciable ya irreversible. Poro, pidímos-yos que lo piensen bien cuandu, dientru d'unos díes aprueben la reforma del Estatutu d'Autonomía. Que camienten si ye mejor facer xuntura con Asturies o seguir tensando la situación. Que valoren si ye más importante consensuar un Estatutu nel que toos podamos tar representaos o arriesgar una imposición unilateral.

Que xulguen, en fin, por qué los asturianos vamos tener que pasar porque Asturies, que foi'l primer reinu cristianu peninsular, nun pueda llamase agora "nacionalidá hestórica", o por qué vamos a transixir pol déficit democráticu que supón el fechu de que la Xunta Xeneral del Principáu nun tenga capacidá pa disolveise y convocar eleiciones anticipaes, o por qué vamos

consentir que l'asturianu, llingua del país y patrimoniu cultural milenariu, nun tenga l'estatus de llingua oficial nel Principáu, o por qué tenemos que quedanos ensin instituciones que cualquier sociedá moderna demanda comu'l Defensor del Pueblu, el Tribunal de Cuentas o'l Conseyu Consultivu, o, por finar, por qué vamos tener que renunciar a la capacidá de xestión financiera y tributaria qu'afite'l nuesu autogobiernu dende'l puntu de vista económico.

Que lo sopelexen bien, porque nós nun nos vamos a dar. Y si estes demandes de xusticia democrática nun s'inixeran nel Estatutu d'Autonomía, el mesmu día de la so aprobación en falsu esixiremos, otra vegada y contundentemente, la so revisión y reforma y siguiremos promoviendo les declaraciones d'oficialidá nos conceyos y nos centros educativos y nes más dixebradas instituciones públiques y privaes y esparderemos les aiciones de desobediencia civil y de resistencia social hasta que llogremos que la dignidá del pueblu asturianu se reconoza dafechu.

Pero tamos a tiempu. Somos muchos. Somos muchos más lo que queremos a Asturies que los que la desprecien. Podemos facelos camudar. Ési ye'l nuesu enfotu y el nuesu compromisu. ¡AUTOGOBIERNU Y OFICIALIDÁ AGORA! ¡PUXA ASTURIES!

